



Per la mort da Gion Giusep Flury

* 9 da fevrer 1922 + ils 5 da matg 2000

Ils 5 da matg ha il zenn grond da s. Vigeli annunziau la mort da Gion Giusep Flury. In'annunzia che nus havein stuiu acceptar, denton insumma buca spitgada da sia famiglia ed amitgs.

Igl aug Sep, sco quei che nus numnavan el, ei naschius ils 9 da fevrer 1922 ad Acletta/Mustér. El e siu frar schumalin eran ils affons vegls ord la secunda lètg da lur bab Tumaisch e la mumma Catarina nata Tuor. Las scolas ha el frequentau a Mustér e quei

muntava mintga di in viadi da quater ga mes'ura a pei e quei era da nevadas cun miserablas vias. La scola da recrut ha el frequentau duront l'uiara a Sion. Silsuenter ha ei giu num star guardia sils cunfins. Suenter quels onns burasclus e da gronda fom ha el luvrau sco vitturin el contuorn da Mustér.

Igl onn 1944 sespusa el cun la giuvna Maria Monn da Cavorgia. Lur lètg benedescha Dieus cun 10 affons. Duas buobas ston bandunar gia cun quater e siat onns il terrester. Ils Flurys ein secasai a Camischolas ella casa dalla basata Clementina, la quala igl aug Sep ha lu sez acquistau. Cur ina famiglia da 10 dels ha ei giu num parter en bein la paga. Plirs onns ha el retratg quella dalla Furka-Alpsu e silsuenter da differen-
tas interpresas da Tujetsch. Cu ses affons han giu finiu ils emprendissadis eis el sez semess el baun da scola per emprender da miradur. Quel ha el terminau cun 46 onns e quei cun in excellent examen final.

En sia veta ha ei bein dau enqual umbriva mo ils dis da bi sulegl ein segir ella pluralitat. In di da spir bialaura ha el astgau guder igl onn 1962 cu el e sia famiglia ein vegni pri si dalla vischerna sco burgheis da Tujetsch. Ils davos onns han el e sia dunna priu empau pli lev e serendi ella casa da vegls s. Vigeli.

Biars da nus seregordan segir aunc da ses numerus necrologs ch'el ha secret ella gasetta Romontscha per in ni l'auter vischin. Sco quei ch'el fineva quels cun giavischlar al trapassau in ruaus pascheivel less era jeu dir: Aug Sep ruaussa en pasch!

Hans Monn